

Impuls al svilup economic regional

La regenza vul sustegnair projects concrets a favur dal svilup economic regional

■ (anr/hh) **Ils meds finanzials previs per las organisaziuns regionalas vul la regenza impunder per il svilup regional. Quai duai succeder a favur da la realisaziun da projects empermettents. En sia resposta ad ina dumonda da deputà Andrea Brüesch constatescha ella che la promoziun da l'economia sto vegnir contemplada en in context regional.** Cun occasiun da la sesiun da l'october ha deputà *Andrea Brüesch* (pps, Curvalda) inoltrà a la regenza ina dumonda concernent il svilup economic regional e la promoziun da las organisaziuns regionalas. 41 deputadas e deputads han sutscrit questa intervenziun. En quella constateschan els che il dumber da naschientschas e da lavurants sa reducescha fermamain en differents regions dal Grischun. En tscherzas regions sto perquai vegnir dà ina cuntrapaisa. La concentrasiun sin ils centers sco er in svilup economic efficaci en las valladas ed en las regions èn indispensabels. En la nova lescha per promover il svilup economic en il chantun Grischun èsi alura er previs che las organisaziuns regionalas duain vegnir integradas considerablmain en la promoziun chantunala da l'economia. En quest senn fa il Tirol dapi decennis ina politica regionala cun success, engaschond managers regionalas. Tenor Andrea Brüesch ston las vischnancas metter a disposiziun dapli meds finanzials per quest intent. Structuras regionalas fermas correspundan dentant er a l'interess dal chantun, uschia ch'i ston vegnir mess a disposiziun dapli meds finanzials per projects per il svilup economic. Per che projects pli effizients possian dentant insumma vegnir sviluppads en las regions sto er il chantun pagar contribuziuns pli grondas a las organisaziuns regionalas per stabilir in sector «svilup regional», uschenavant che quellas èn prontas d'agir en moda orientada a l'economia.

Rinforzar las regions

Sco quai che la regenza constatescha en sia resposta vegn la posiziun da las regions rinforzada en la nova constituziun chantunala. Ellas na survegnan dentant betg la madema posiziun sco las vischnancas; il cussegl grond aveva refusà in nov plaun politic. En emprima lingia adempleschan las organisaziuns regionalas



En l'avegnir vul la regenza dar impuls a la promoziun da l'economia regionala. Tant ils meds finanzials federals sin basa da la lescha federala sco er ils meds finanzials chantunals pon vegnir impundids d'ina vart per ils secretariats da las organisaziuns regionalas u per projects concrets.

KEYSTONE

las incumbensas che vegnan delegadas ad ellas tras las vischnancas. Ellas surpiglian dentant er incumbensas chantunales. Las novas incumbensas en il sector da la politica regionala dependan da la concepziun definitiva da la nova politica regionala. Il chantun promova la collavraziun intercommunala en tut ils secturs e quai sin via da la cussegliaziun tras differents posts da servetsch. Finanzialmain sustegna il chantun las organisaziuns regionalas en il rom da l'execuziun da l'agid d'investiziun.

Context regional

La promoziun da l'economia sto vegnir contemplada en in context regional. Per il svilup economic da las regions han las organisaziuns regionalas ina rolla impurtanta. Er fusiuns da vischnancas na midan per regla nagut vi da quai. Las organisaziuns regionalas mantegnan ina rolla directiva per il svilup regional e

ston vegnir cumpigliadas correspundentamain. La promoziun succeda sin basa da la lescha per promover il svilup economic en il chantun Grischun. In sustegn finanziel survegnan actualmain mo organisaziuns regionalas en il perimenter tenor la lescha federala davart agids d'investiziun per territoris da muntogna. Cun la realisaziun da la nova politica regionala previsiblmain a partir da l'onn 2008 po succeder en quest regard in'extensiun sin tut las regions grischunas. Er la regenza è da l'avis ch'in svilup economic regional sa basia sin centers regionalas fermas. Ils meds finanzials previs per las organisaziuns regionalas tenor il preventiv vul la regenza impunder per il svilup regional. L'import è vegnì reduci en connex cun la prestaziun per sanar las finanzas dal chantun e na po per quest motiv betg vegnir augmentà.

Svilup economic è necessari

La regenza constatescha ch'ils meds finanzials existents che stattan a disposiziun per las organisaziuns regionalas ston vegnir impundids en emprima lingia per il svilup economic regional. Questa midada da sistem ha lieu successivamain a partir dad uonn. Il manaschi general dals secretariats da las organisaziuns regionalas sto vegnir finanzià da las vischnancas. Tant ils meds finanzials federals sin basa da la lescha federala sco er ils meds finanzials chantunals pon vegnir impundids d'ina vart per ils secretariats da las organisaziuns regionalas per il svilup e da l'autra vart per activitads orientadas a projects. «Igl è absolutamain necessari ch'ils projects augmentian la professionalitad da las organisaziuns regionalas e ch'els stettian en in connex direct cun il svilup economic», punctuescha la regenza.